

4. TERSEBARNYA FITNAH

i. Pengenalan Fitnah

Fitnah bermaksud bala, ujian dan dugaan. Berasal dari bahasa arab sebagaimana “Aku fitnahkan emas dan perak”.Tujuannya adalah untuk membezakan antara yang baik dengan yang buruk.

Adapun fitnah yang dimaksudkan oleh Rasulullah s.a.w adalah perkara-perkara yang akan berlaku selepas zaman baginda sehingga seseorang itu menjadi keliru untuk memutuskan antara yang benar atau yang salah lalu sebahagian mereka menjadi kufur.

Firman Allah s.w.t : { Dan kami timpakan ke atas kamu dengan keburukan dan kebaikan sebagai fitnah (cubaan) } Al-Anbiyaa : 35

ii. Bahaya Fitnah

Firman Allah s.w.t : { Dan takutlah sekalian kamu kepada fitnah yang tidak hanya menimpa orang-orang yang zalim di kalangan kamu } Al-Anfaal : 25

Dari Abi Hurairah r.a sesungguhnya Rasulullah s.a.w bersabda : ((Bersegeralah kamu sekalian dengan amalan-amalan sebelum datang fitnah-fitnah seperti cebisan malam yang gelap; (pada waktu fitnah-fitnah itu hadir) berpagi seorang lelaki sebagai mukmin, berpetang sebagai kafir atau berpetang sebagai mukmin berpagi sebagai kafir; dia menjual agamanya dengan habuan dari dunia)) (Riwayat Muslim)

iii. Kedatangan Fitnah

Dari az-Zubair bin ‘Adiyy berkata: “Kami mendatangi Anas bin Malik r.a maka kami mengadu kepadanya tentang apa yang kami hadapi dari Hajjaj (bin Yusuf) lalu beliau berkata” : “Bersabarlah kamu sekalian, sesungguhnya tidak datang satu zaman kecuali yang selepasnya lebih buruk dari sebelumnya sehinggalah kamu kembali bertemu dengan Tuhanmu. Aku mendengarnya dari Rasulullah s.a.w” (Riwayat al-Bukhari)

Dalam hadith Abdullah bin ‘Amr bin Al-‘Ash r.a, Rasulullah s.a.w bersabda : ((...Dan sesungguhnya ummat kamu sekalian ini dijadikan kebaikannya pada (golongan) awalnya, dan akan menimpa (golongan) akhirnya bala-bala dan perkara-perkara yang kamu semua mengingkarinya. Datangnya fitnah-fitnah itu lalu memperkecilkan sebahagiannya akan sebahagian yang lain. Dan akan datangnya fitnah lalu berkatalah seorang mukmin (pada waktu itu) : “Inilah kemusnahanku” kemudian fitnah itu hilang lalu dia berkata : “Inilah dia, inilah dia” Maka barangsiapa yang suka untuk diselamatkan dari neraka dan dimasukkan ke dalam syurga (hendaklah) kematian datang menjemputnya dalam keadaan dia beriman dengan Allah dan hari Akhirat, dan (hendaklah) dia mendatangi manusia sebagaimana dia suka untuk didatangi sedemikian...)) (Riwayat Muslim)

iv. Beberapa Fitnah Yang Telah Berlaku

1. Fahaman-fahaman sesat dari timur
2. Pembunuhan Khalifah Uthman bin Affan r.a
3. Peperangan Jamal
4. Peperangan Siffin
5. Kemunculan Golongan Khawarij
6. Peperangan al-Harrah
7. Fitnah Pernyataan Al-Quran itu Makhluk
8. Mengikut Langkah Yahudi dan Nasrani